

## 南無華嚴會上佛菩薩（三稱）

### 大方廣佛華嚴經入不思議解脫境界普賢行願品卷第二十

「爾時寶華燈城北，有菩提樹，名：普光徧照法雲聲幢。以念念顯示一切如來莊嚴道場，金剛堅固摩尼寶王而為其根，一切摩尼以為其榦，眾襍妙寶以為其葉，枝條華果次第分布，並相稱可。四方上下，圓滿莊嚴，放種種色寶燄光明，出妙音聲，演說一切諸佛如來自在神通甚深境界。於彼樹前有一香池，名：寶華光法雲聲，香水盈滿，妙寶為岸，百萬億那由他寶樹圍繞，一一樹形，如菩提樹，眾寶瓔珞周帀垂下。復有無量宮殿樓閣，眾寶所成，周徧道場以為嚴飾。彼香池內，出大蓮華，名：普現三世一切如來莊嚴境界雲，須彌山極微塵數如來，於中出現。其第一佛，名：普智寶燄吉祥威德王，於此華上，最初得阿耨多羅三藐三菩提，無量千歲，演說妙法，成熟眾生。其彼如來未成佛時，十千年中，菩提樹王放大光明，顯現神通，成熟眾生。

所謂：十千年前，放淨光明，名：一切眾生離垢燈，若有眾生遇斯光者，心自開悟，知十千年後佛當出現；九千年前，放淨光明，名：具足無垢吉祥藏，若有眾生遇斯光者，得清淨眼，見一切色，知九千年後佛當出現；八千年前，放大光明，名：一切眾生業果音聲，若有眾生遇斯光者，悉能自知業海差別，種種果報，知八千年後，佛當出現；七千年前，放大光明，名：生一切善根音聲，若有眾生遇斯光者，一切

善根，悉皆圓滿，知七千年後佛當出現；六千年前，放大光明，名：佛不思議境界音聲，若有眾生遇斯光者，其心廣大，普得自在，知六千年後，佛當出現；

五千年前，放大光明，名：嚴淨一切佛剎音聲，若有眾生遇斯光者，悉見一切清淨佛土，知五千年後佛當出現；四千年前，放大光明，名：一切如來境界無襍亂燈，若有眾生遇斯光者，悉能深入如來境界，徧一切處，往觀諸佛，知四千年後佛當出現；三千年前，放大光明，名：一切眾生普照三世現前燈，若有眾生遇斯光者，悉能現見一切如來諸本事海，知三千年後佛當出現；二千年前放大光明，名：三世智電燈，若有眾生遇斯光者，則見一切如來過去相應行海，知二千年後佛當出現；一千年前，放大光明，名：如來無翳智慧燈，若有眾生遇斯光者，具足普眼，能見諸佛神通變化，淨一切剎，知一千年後佛當出現；一百年前，放大光明，名：令一切眾生皆得見佛集諸善根，若有眾生遇斯光者，則得成就見佛三昧，知百年後佛當出現；次七日前，放大光明，名：一切眾生大喜愛樂音，若有眾生遇斯光者，則得見佛，能生愛敬，知七日後佛當出現。

善男子！如是種種無量無邊清淨光明，十千年中，乃至七日調伏眾生，令其成熟。滿七日已，一切世界，悉皆震動，純一清淨，無諸穢襍。念念普現十方一切清淨佛剎，亦現彼剎

種種莊嚴，若有眾生根性淳熟，應見佛者，咸詣道場。

爾時，彼世界中一切輪圍、一切須彌、一切諸山、一切河海、一切大地、一切城邑、一切垣牆、一切宮殿、一切音樂、一切資具、一切瓔珞、一切語言，皆出音聲，讚說一切諸佛如來神通境界變化莊嚴；又出一切香雲、一切燒香雲、一切末香雲、一切塗香雲、一切香摩尼形像雲、一切摩尼衣雲、一切寶燄雲、一切燄藏雲、一切瓔珞雲、一切妙華雲、一切音樂雲、一切如來光明雲、一切如來圓光雲、一切如來願聲雲、一切如來言音海雲、一切如來種種相好色光明雲，顯示如來出現世間不思議相。善男子！此普現三世一切如來，莊嚴境界大寶蓮華王，有十佛剎極微塵數妙寶蓮華以為眷屬，周帀圍繞。其諸蓮華，一一臺上，皆有摩尼寶師子座；一一座上，皆有菩薩，結跏趺坐。

善男子！彼普智寶燄吉祥威德王如來，於此成阿耨多羅三藐三菩提時，即於十方一切世界，成阿耨多羅三藐三菩提，隨眾心，悉現其前，為轉法輪。於一一世界，令無量眾生，離惡道苦；令無量眾生，生人天中；令無量眾生，住於聲聞、辟支佛地；令無量眾生，成就出離菩提之行；令無量眾生，成就無垢勇猛幢菩提之行；令無量眾生，成就清淨法光明菩提之行；令無量眾生，成就威德清淨根菩提之行；令無量眾生，成就隨順平等力菩提之行；令無量眾生，成就現前入

法城菩提之行；令無量眾生，成就徧至一切處，不可壞神通力菩提之行；令無量眾生，普於十方一切如來、應、正等覺，生希有心，安住平等菩提之行；令無量眾生，安住三昧門菩提之行；令無量眾生，成就緣一切清淨境界菩提之行；令無量眾生，發菩提心；令無量眾生，住菩薩道，修菩薩行；令無量眾生，安住清淨波羅蜜道；令無量眾生，住菩薩初地；令無量眾生，安住菩薩二地、三地乃至十地；令無量眾生，入於菩薩殊勝行願；令無量眾生，安住普賢清淨行願。

善男子！彼普智寶燄吉祥威德王如來，現如是等佛不思議自在神力轉法輪時，於彼一一諸世界中，隨其所應，念念調伏，教化成熟無量眾生。

時，普賢菩薩，知寶華燈王城中眾生，自恃色貌及諸境界，放逸惛醉而生驕慢。為欲調伏彼眾生故，化現妙身，端正殊特，往詣彼城。放大光明，普照一切，令彼聖王及諸妙寶、日月、星宿、寶樹、寶衣、摩尼、瓔珞、眾生身等，一切光明，威德端嚴，悉皆不現。譬如日出，眾星奪耀，亦如聚墨，對閻浮金。時諸眾生，各心念言：『此為是誰？為天？為梵？今放此光，暎蔽一切，令我等身所有威德，光色端嚴，皆不顯現。種種思惟，無能解了。』

爾時，普賢菩薩，在彼輪王宮殿之上虛空中住，而告之言：

『大王當知，今汝國中，有佛出興，在普光徧照法雲聲幢菩提樹下。時輪王女，普喜吉祥蓮華眼，見普賢菩薩所現色身，光明自在，及聞身上種種瓔珞諸莊嚴具所出妙音，生愛敬心，生歡喜心，生深信心。作如是念：『願我所有一切善根，得如是身、如是莊嚴、如是相好、如是威儀、如是神通、如是威德。今此大聖，能於眾生生死長夜黑闇之中，放大光明，顯示如來出興於世。願令於我，亦得如是，為諸眾生，作智光明，破彼所有無知黑闇；願我所在受生之處，常得不離此善知識。』』

善男子！時，毗盧遮那寶蓮華藏妙吉祥髻轉輪聖王，與其寶女，千子眷屬，大臣輔佐，七寶四兵，及其城內無量人眾，前後圍繞，以王神力，俱昇虛空，高一由旬，放大光明，照四天下。普使一切，咸得瞻仰，欲令眾生俱往見佛，以偈讚曰：

佛今已出於世間	普救一切諸群品
汝等宜應速發心	往詣最勝導師所
經於無量俱胝劫	乃有如來興出世
開示甚深微妙法	普為利樂諸眾生
佛觀一切諸世間	顛倒無明常翳惑
生死逼迫輪迴苦	而起救護大悲心
無數千萬俱胝劫	修習種種菩提行
成就最勝大悲心	普滅一切眾生苦

頭目耳鼻身手足 如是一切皆能捨  
為證甘露佛菩提 經於無量無邊劫  
過於無量俱胝劫 出世導師難可遇  
見聞供養及親承 一切獲益無空過  
我今與汝俱往詣 觀彼最勝調御師  
為轉無上大法輪 道樹降魔成正覺  
汝應觀佛妙色身 放無邊際光明網  
種種妙色咸清淨 除滅眾生惑苦暗  
從於一一毛孔中 普放無數光明雲  
徧照一切諸群生 咸令愛敬心歡喜  
汝等各各應思念 發起廣大精進心  
即時同詣彼如來 親近至誠而供養

爾時轉輪聖王，說偈讚佛，開悟國內一切眾生已，從輪王善根，出十千種大供養雲，往詣道場，向如來所。所謂：出一切寶蓋雲、一切華帳雲、一切寶衣雲、一切香海雲、一切寶座雲、一切寶幢雲、一切宮殿雲、一切妙華雲、一切寶鈴網雲、一切莊嚴具雲，於虛空中周徧嚴飾。到已，頂禮普智寶燄吉祥威德王如來足，右繞無數百千萬市，即於佛前，坐普照十方光明摩尼寶蓮華座。

時輪王女，普喜吉祥蓮華眼，即解身上一切瓔珞諸莊嚴具，持以奉散。時莊嚴具，於虛空中變成大摩尼寶蓋，有種種色

摩尼寶網，周帀垂下，一切龍王，共所執持，一切宮殿，於中間列，十種寶蓋眷屬圍繞，形如樓閣，內外清淨，諸瓔珞雲，徧覆其上，及諸寶樹，香海摩尼，種種妙飾，以為嚴好。於此蓋中，有菩提樹，枝葉榮茂，普覆法界，念念示現無量莊嚴。

毗盧遮那如來，坐此樹下，有不可說不可說佛剎極微塵數菩薩前後圍繞，一切皆從普賢菩薩行願出生，住諸菩薩不可思議無差別住。亦見一切諸世間主，合掌瞻仰，圍繞如來；亦見一切如來自在神通之力；又見一切諸劫次第，世界成壞；又亦見彼一切世界，一切諸佛出興次第；又亦見彼一切世界，一一皆有普賢菩薩，種種供養一切如來，種種調伏一切眾生；又亦見彼一切菩薩，及其自身，莫不皆在普賢身中；亦見自身，在一切如來前、一切普賢前、一切菩薩前、一切眾生前；又亦見彼一切世界，一一各有佛剎極微塵數世界，種種際畔、種種任持、種種形狀、種種體性、種種安布、種種莊嚴、種種清淨、種種莊嚴雲而覆其上，種種劫名、種種佛興、種種三世、種種方處、種種住法界、種種入法界、種種住虛空、種種菩薩莊嚴、種種菩薩住處、種種如來菩提場、種種如來神通力、種種如來師子座、種種如來大會海、種種如來眾差別、種種如來巧方便、種種如來轉法輪、種種如來妙音聲、種種如來言說海、種種如來契經雲。既見是已，其心清淨，生大歡喜。

時彼如來，為此女人說修多羅，名：一切如來轉法輪音，十佛剎極微塵數修多羅而為眷屬。時彼女人，聞此經已，即得成就十千三昧門，身心柔軟，無有粗強，如初受胎，如始誕生，如娑羅樹初始生芽；彼三昧心柔軟可愛，亦復如是。所謂：現見一切佛三昧、普照一切剎三昧、深入一切三世門三昧、演說一切佛法輪三昧、了知一切佛願海三昧、開悟一切眾生令出生死苦三昧、常願破一切眾生闇三昧、常願滅一切眾生苦三昧、常願生一切眾生樂三昧、教化一切眾生不生疲厭三昧、一切菩薩住一切地自在莊嚴三昧、一切菩薩無障礙幢三昧，普詣一切清淨佛剎三昧。得如是等十千三昧已，復得微細等引，謂：不動心、歡喜心、安慰心、普光照心、順善知識教心、緣甚深一切智心、隨順慈無量教行心、捨離一切執著心、不住一切世間境界心、深入如來境界心、普照一切佛色相海心、不散亂心、不飄動心、無障礙心、無高下心、無疲倦心、無退轉心、得自在心、離懈怠心、正念諸法自性心、安住一切法門海心、修行一切法門海心、了知一切眾生海心、救護一切眾生海心、普照一切世界海心、普生一切佛願海心、悉破一切障礙山心、積集廣大福聚心、現見如來十力心、普照菩薩境界心、增長菩薩助道心、徧緣一切方海心。

一心思惟觀察普賢所有大願，發一切如來十佛剎極微塵數平



等願海。所謂：願嚴淨一切佛國；願成熟一切眾生；願徧知一切法界；願普入一切法界海；願於一切佛剎盡未來劫修菩薩行；願盡未來際劫，不捨一切眾生；願得親近一切如來；願得承事一切善友，悉令歡喜；願得供養一切如來，悉令徧滿；願於念念中修菩薩行，增一切智無有間斷。發如是等十佛剎極微塵數願海，成就普賢所有大願。時彼如來，復為其女，開示演說，發心已來所種善根，所修妙行，所得大果，令其開悟，甚深信解，成就如來圓滿廣大所有願海，一心趣向一切智位。

善男子！復於此前，過十大劫，有世界，名：日輪光照摩尼王，佛號：因陀羅幢吉祥相。時，此蓮華眼女，於彼如來遺法之中，普賢菩薩，勸其修補蓮華座上故壞佛像；既修補已，而復彩畫；既彩畫已，復寶莊嚴，發阿耨多羅三藐三菩提心。善男子！我念過去由普賢菩薩善知識故，種此善根；從是已來，不墮惡趣，常於一切天王、人王種族中生，一切生處，身形殊妙，端正可喜，色相圓滿令人樂見；常見於佛，常得親近普賢菩薩，令我憶持所得法門，乃至於今，示導開悟，成熟於我，令生歡喜。

善男子！於意云何？爾時，毗盧遮那寶蓮華藏妙吉祥髻轉輪王者，豈異人乎？今彌勒菩薩是也。是時王妃，具足圓滿吉祥面者，具足功德寂靜音海夜神是也，今所住處，去此不遠

。時，普喜吉祥蓮華眼童女者，即我身是。我於昔時，身為童女，普賢菩薩，勸我修補蓮華座像，以為無上菩提因緣，令我發阿耨多羅三藐三菩提心。我於彼時，初始發心，次復引導，令我得見普智寶燄吉祥威德王如來，解身瓔珞，散佛供養，見佛神變，聞佛說法，即得：菩薩普現一切世間調伏眾生解脫門。從是得見須彌山極微塵數佛，我皆尊重，恭敬供養，聽彼如來種種說法，聞法歡喜，依教修行，於念念中，常得見彼一切如來，及彼佛剎菩薩大會。

善男子！過彼毗盧遮那威德吉祥世界無垢圓滿劫已，次有世界，名：摩尼輪種種妙色莊嚴，劫名：大光，有五百佛於中出現，我皆承事，恭敬供養，令其歡喜。其最初佛，名：大悲雲幢，我為夜神，見佛出行，恭敬供養；次有佛出，名：金剛那羅延幢，我為輪王，親近承事，恭敬供養。時，佛為我說修多羅，名：一切佛出現，十佛剎極微塵數修多羅以為眷屬，我皆受持；次有佛出，名：金剛無礙德，我於彼時，為轉輪王，恭敬供養，其佛為我說修多羅，名：普照一切眾生根，須彌山極微塵數修多羅而為眷屬，我皆受持；次有佛出，名：火燄山吉祥莊嚴，我於彼時為長者女，供養恭敬，其佛為我說修多羅，名：普照三世藏莊嚴，閻浮提極微塵數修多羅而為眷屬，我皆受持；次有佛出，名：一切法海高勝王，我為天王，恭敬供養，其佛為我說修多羅，名：分別一切法界智，五百修多羅而為眷屬，我皆受持；次有佛出，名

：甚深法吉祥海光，我於彼時，為龍王女，雨如意摩尼寶雲，而為供養，其佛為我說修多羅，名：速疾增長歡喜海，百萬億那由他修多羅而為眷屬，我皆受持；次有佛出，名：寶峰光燄燈，我為海神，雨寶蓮華雲，親近承事，恭敬供養，其佛為我說修多羅，名：法界方便海光明，佛剎極微塵數修多羅而為眷屬，我皆受持；次有佛出，名：功德海光照圓滿吉祥，我於彼時為五通仙，現大神力，六千諸仙眷屬圍繞，雨妙香華，高山峰雲而為供養，其佛為我說修多羅，名：無著法燈，六千修多羅而為眷屬，我皆受持；次有佛出，名：毗盧遮那吉祥藏，我於彼時為主地神，名：平等利益，與無量地神俱，雨一切寶樹雲、一切寶藏雲、一切寶瓔珞雲、一切寶莊嚴雲而為供養，其佛為我說修多羅，名：出生一切如來智藏，無量修多羅而為眷屬，我皆聽聞憶持不忘。

善男子！如是次第五百如來，其最後佛，名：法界虛空寶山圓滿吉祥燈。我於彼時，身為妓女，名：可喜吉祥面。遇佛入城，歌舞供養，承佛威力，踊在空中，以千妙偈讚歎於佛。佛為於我放眉間光，名：普照法界光明莊嚴，光照我身，一切徧滿，我蒙光觸，即得解脫，名：法界方便不退藏門。

善男子！此世界中，有如是等佛剎極微塵數劫，一切如來於中出現，我皆承事，恭敬供養令其歡喜；彼諸如來，為我演說種種正法，我皆憶念，如法受持，乃至不忘一文一句；於

彼一一諸如來所，稱揚讚歎一切佛法，為無量眾生廣作利益；於彼一一諸如來所，得現三世法界藏，住廣大法界身，得入一切智光明，入一切普賢行。善男子！我依一切智光明故，於念念中見無量佛，既見佛已，先所未得、先所未見、先所未聞，普賢菩薩所有妙行悉得成就。何以故？以得一切智光明故，差別顯示無量無邊法界門故。」

爾時，普救眾生夜神，欲重明此解脫義，承佛威力，為善財童子而說偈言：

善財汝應聽我說	甚深難入難見法
普光徧照於三世	一切差別智明門
如我初發菩提心	勤求佛智諸功德
所證無邊解脫門	為汝宣揚應諦聽
憶昔過刹極微劫	時有劫名無垢輪
刹號勝幢徧照燈	莊嚴廣大無諸垢
於中十力出世間	量與須彌塵數等
初佛寶燄吉祥光	第二法王功德幢
第三法幢福須彌	第四無畏自在王
第五佛名寂靜王	第六佛名寂靜城
第七如來名稱山	第八導師須彌德
第九佛號吉祥光	第十名為月面佛
於此十佛世尊所	令我開悟最初門
此後次第有十佛	相續出興於世間

最初佛號虛空住  
三名出生住諸方  
第五佛名高勝光  
第七如來法燄光  
第九出生蓮華王  
此十佛海光明照  
此後相續時無間  
第一如來光幢王  
第三佛名利益心  
第五如來名天智  
第七佛名智吉祥  
第九勇猛天行佛  
此十能顯廣大法  
此後無間復值遇  
最初寶燄山吉祥  
第三佛號法光明  
第五智月妙眼佛  
第七善逝須彌德  
第九摩尼藏王佛  
此後次第有十佛  
最初佛號廣大智  
第三如來功德雲  
第五苦行圓滿光  
第二如來名普光  
第四如來正念海  
第六世尊須彌雲  
第八如來名稱山  
第十大悲法界華  
令我悟入第二門  
次第復有十佛出  
第二佛名智慧光  
第四如來帝吉祥  
第六佛號尊慧王  
第八佛號光照王  
第十法界蓮華尊  
令我成就第三門  
次第相續十佛出  
第二功德吉祥佛  
第四佛名蓮華藏  
第六如來香寶光  
八名乾闥婆光明  
第十具足威德佛  
相續出興於世間  
第二佛號寶光明  
第四佛名最勝相  
第六佛號那羅延

第七世尊須彌德  
第九如來無勝幢  
此後次第有十佛  
初名帝德娑羅王  
第三佛號高顯光  
第五世尊地威德  
第七法海大智音  
第九如來智光照  
此後次第有十佛  
初梵光二虛空音  
第四圓滿光明輪  
六虛空燈七妙德  
第九福光寂靜德  
此後次第有十佛  
初真諦力智光明  
第三名為高顯光  
第五善逝法出生  
第七世尊吉祥相  
第九佛名寶肢節  
此後次第有十佛  
初佛願海吉祥燈  
第三堅固須彌德  
第五如來法智尊

第八功德輪圍王  
第十佛名大樹王  
相續出興於世間  
二名普現世主身  
第四佛名金剛光  
第六甚深法德王  
第八佛號須彌幢  
第十妙寶吉祥王  
相續出興於世間  
第三法界像吉祥  
第五諸方智光幢  
第八徧照吉祥光  
第十大悲雲吉祥  
相續出興於世間  
二現一切眾生前  
第四佛號光明身  
第六名為速疾風  
第八如來勇猛幢  
第十普現三世光  
相續出興於世間  
二佛吉祥金剛山  
第四佛名念幢王  
第六佛名般若燈

第七佛號德光幢  
第九智行法界門  
此後次第十四佛  
最初福山功德王  
第三如來法駕輪  
第五功德輪吉祥  
第七佛號須彌燈  
第九如來大寂聲  
十一眾生吉祥燈  
十三無能勝力幢  
皆於世間為上首  
此後次第有十佛  
第一佛名法自在  
第三世尊海慧音  
五名具足言辭佛  
第七佛智自在轉  
九等眾生吉祥身  
如是須彌塵數劫  
普為眾生作世燈  
復過佛剎極微數  
我於一切咸供養  
我於如是無邊劫  
汝今聞已速修行

第八佛名廣大智  
第十法海智吉祥  
相續出興於世間  
次佛名為智吉祥  
第四寶王吉祥佛  
第六普智燄光佛  
第八世尊迅疾光  
第十佛名寂靜幢  
十二大願速吉祥  
十四世尊智燄海  
普利一切諸眾生  
相續出興於世間  
第二無著智如來  
第四眾密音調御  
第六妙音大吉祥  
第八普現眾生前  
十名德賢自性山  
所有上首諸如來  
我皆供養無空過  
劫中所有諸如來  
入此甚深解脫海  
修行得此解脫門  
不久亦當如我得

「善男子！我唯知此：菩薩普現一切世間調伏眾生解脫門，如諸菩薩摩訶薩，集無邊行海，發種種解心，現種種身，具種種根，滿種種願，入種種三昧，起種種神通，成就種種方便，能作種種利益，遊入種種智藏，照種種法門海，得種種法光明，往種種佛剎海，受種種佛灌頂，事種種善知識，悟種種解脫門，證種種自在心，起種種無作行，現種種難思色，順種種眾生心，起種種變化身，入種種菩薩地，知種種法因緣，離種種妄分別，依種種菩薩願，持種種佛遺教，安住出生普賢妙行。而我云何能知、能說彼功德行？善男子！去此不遠，菩提場中有主夜神，名：具足功德寂靜音海，坐星宿光幢摩尼王莊嚴寶蓮華藏師子之座，百萬阿僧祇夜神以為眷屬，前後圍繞。汝詣彼問，菩薩云何學菩薩行、修菩薩道？」時，善財童子，頂禮其足，繞無數帀，殷勤瞻仰，一心戀慕，辭退而去。

大方廣佛華嚴經普賢行願品卷第二十

離婆離婆帝 求訶求訶帝 陀羅尼帝 尼訶囉帝  
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉  
俱住俱住 摩囉摩囉 虎囉 吽 賀賀  
蘇怛拏 吽 潑抹拏 娑婆訶（三遍）



願以此功德 莊嚴佛淨土 上報四聖恩 下濟六凡苦  
所有法界眾 悉修菩提行 盡此一報身 同生極樂國